

四庫全書

史部

欽定四庫全書

史部

皇朝文獻通考卷六十九
七十

內閣中書_臣實汝翼覆勘

總校官中書_臣孫溶

欽定四庫全書

皇朝文獻通考卷六十九

學校考

七

直省鄉黨之學

一

臣等謹按天下者黨庠術序之推也士習者民風之本也我

朝文命覃敷崇尚儒術海內喁喁向風說禮樂而敦詩書士有言不衷於理而行不軌於正者則鄉里

非之何者

列聖之教澤有以深入乎人心而庠序之教化有以表率乎民俗也今

國家德政化成百有餘歲矣土宇版章日以增闢山
陬海澨蠻土瘴鄉悉建之師儒而沐以禮義加之
聖天子揆文奮武拓地二萬餘里遠極無雷日入之鄉
未習聲名文物之化者皆舉踵逃聽各效其

尊親之戴而食黜懷音豈非明倫修教之方即一道同

風之具而為中外所會歸乎若夫敦實黜浮崇經
勵學塞奔競而防詖窳士習悉化其偏陂而風教
胥臻乎醇厚視學者固職有專屬而守土諸臣所
為恪遵

令典以振新乎士類維持乎治化者也至於別裁偽體示
以清真屏斥支離

頒之程式使操觚者陳言務去以宗法先民秉鐸者得
所遵循以嚴其繩尺而且甄別教職

提訓學臣以端其表率之原樹其衡量之準此文風所以丕變而蹈德詠仁者無不和其聲以鳴

國家之盛歟他如郡邑廩增之額生童入學之數考核課試之條因革損益隨時折中皆有以仰興賢育才

嘉惠儒林之至意焉

臣

等謹連類附纂於篇

順治元年定直省各學支給廩餼法在京者戶部支給在外者州縣官支給

命賑助貧生褒卹順天府學死節之士時以兵火之後士
有菜色

特命給予錢粟故明流賊之亂臨難殞身者順天學不下
百人更予褒卹以勵風化從順天督學御史曹溶
請也

以

御極覃恩

詔各省府州縣儒學食廩生員仍准廩給增附生員仍准

在學肄業俱照例優免

定旌表孝行節義之例是時奉

恩詔所在孝子順孫義夫節婦有司諮訪確實申該巡按御史詳覈奏聞以憑建坊旌表嗣又

敕部定議建立忠孝節義祠宇尋禮部議奏八旗直省凡有孝行節義之人例得請旌恭遇

覃恩彰善大典即鄉曲貧民勿令湮沒又節婦年逾四十而身故者守節已歷十五載以上亦應予旌酌設

祠宇入於祀典永為定例其設立祠宇應令順天
奉天直隸各省府州縣衛每處各建二祠一為忠
義孝弟之祠建於學宮之內祠門立石碑一道刊
刻姓名於其上已故者設牌位於其中一為節孝
婦女之祠另擇地營建祠門外建大坊一座亦標
姓名於其上已故者亦為牌位八旗分左右翼擇
地各建二祠每年春秋二祭至於建坊銀兩應停
給奉

旨孝行節義建立牌坊年久毀壞遂至湮沒今欲設立祠
宇特為昭垂久遠之意並非欲節省錢糧部議建立祠
宇停給銀而不合仍著給與餘依議

定游學來京士子附順天府學例遠方士子游學
京師者取保結准附順天府學一例考試又設廩
十名照縣學例充貢至二年又定查明本身父母
墳墓向係北方土著者即令入籍應試其實係遠
方游學來者皆發回本籍應試

二年平定陝西

恩詔本省各學廩增附生仍舊肄業照例優免廩生內每學貢二名提學官於學田內動支錢糧賑給貧生

頒

恩詔河南河北江南等處各學恩貢一名正貢一名貧生

照例賑給

又

頒部定生員品服式銀雀帽頂高二寸帶用九品

烏角圓板四塊

藍袍青邊披領同

四年定直省儒童入學額數大學四十名中學三十名小學二十名至十五年又定直省取進童生大府二十名大州縣十五名小學四五名

定直省各學廩膳增廣各生額數廩膳生員府學四十名州學三十名縣學二十名衛學十名增廣生員名數同

平定廣東

恩詔廣東各府州縣學廩增附生仍准食廩肄業槩予優
免每學恩貢一名正貢一名俱照平定中原例舉行其
貧生在學田內動支錢米賑給孝子順孫義夫節婦所
在巡按御史奏聞建坊旌表

五年十一月恭奉

太祖武皇帝配

天及追尊

四祖考妣帝后

尊號禮成

恩詔各直省鄉試副榜諸生廩監准貢增附准入監肄業
每學拔貢一名即用本年科舉首卷送部廷試如首卷
中式或有事故以次優卷挨補

七年改江寧國子監為江寧府學

又裁蘇松學政歸併江寧

八年又申嚴學臣考試及約束教官生員之法都
察院條議一學臣報滿照例考核公明者優升溺

職者叅處一歲科兩考完日即報部銓補新舊交代以杜署事諸弊一學臣以到任日為始歲考限十二月考完每三月解卷一次科考分四次解卷以憑磨勘所取生童文字以純正典雅為主詭謬者本生褫革學臣分別卷數之多寡議處一生員不許聚衆結社糾黨生事及濫刻選文憲稿一教官生員不遵條教者學臣嚴行懲治若與武職兵丁有爭教官生員聽學臣處治不許武職擅責武

職兵丁聽該衙門處置不許生員結黨爭抗一學
官不宜懸缺致曠職業撫臣務按缺題請下吏部
銓補其有不由科貢出身濫冒教職者一併題明
送部別用若署事教官止用本學及別學不得濫
委雜流從之

始令八旗子弟考試取入順天府學滿洲蒙古子
弟內院禮部會同順天學政考試通清漢文者繙
譯漢字文一篇通清文者作清字文一篇漢軍子

弟令與順天府民童一例出題考試

互見旗學門

恭上

皇太后徽號禮成

恩詔直省儒學貧生於學田內動支銀米賑給

九年

頒卧碑文於直省儒學明倫堂

文曰朝廷建立學校選取生員免其丁糧厚以廩膳設學院學道學官以教之各衙門官以禮相待全要養成賢

才以供朝廷之用諸生皆當上報國恩下立人品所有
條教開列於後

一生員之家父母賢智者子當受教父母愚魯或
有為非者子既讀書明理當再三懇告使父母不
陷於危亡

一生員立志當學為忠臣清官書史所載忠清事
蹟務須互相講究凡利國愛民之事更宜留心
一生員居心忠厚正直讀書方有實用出仕必作

良吏若心術邪刻讀書必無成就為官必取禍患
行害人之事者往往自殺其生常宜思省

一生員不可干求官長交結勢要希圖進身若果
心善德全上天知之必加以福

一生員當愛身忍性凡有司官衙門不可輕入即
有切已之事止許家人代告不許干與他人詞訟
他人亦不許牽連生員作証

一為學當尊敬先生若講說皆須誠心聽受如有

未明從容再問毋妄行辨難為師亦當盡心教訓
勿致怠惰

一軍民一切利病不許生員上書陳言如有一言
建白以違制論黜革治罪

一生員不許糾黨多人立盟結社把持官府武斷
鄉曲所作文字不許妄行刊刻違者聽提調官治
罪

令地方官選取教讀訓督土司子弟土司子弟有

向化願學者令立學一所行地方官取文理明通者一人充教讀以司訓督歲給銀八兩膏火二十兩於正項錢糧支給

定各學條例禮部題准各省府州縣提調官員宜嚴束生徒按季考校凡學內殿堂齋房損壞即辦料興修其齋夫膳夫學糧學田等項以時撥給不許遲誤尅減生員除干謁瀆擾例應處治外宜以禮相待勿得橫肆凌侮

責成提調教官課習生儒并嚴禁坊賈刊刻淫詞
瑣語禮部題准嗣後直省學政將四子書五經性
理大全資治通鑑綱目大學衍義歷代名臣奏議
文章正宗等書責成提調教官課令生儒誦習講
解務俾淹貫三場通曉古今適於世用坊間書賈
止許刊行理學政治有益文業諸書其他瑣語淫
詞通行嚴禁

定考覈教職之例提學按臨之日將各學教官考

其學行兼優教有成效者據實列薦其行履無過
但學問疎淺者姑行訓飭責令勉進有老病不堪
者惟令以禮致仕若鑽營委署橫索束脩卑污無
恥素行不謹者即行叅奏分別究革其有把持學
校生員及書役門夫行私誘惑者一併究擬重治
奉

諭禮部明末寇陷都城君死社稷當時文武諸臣中豈無
一二殉君死難者幽忠難泯大節可風爾部會同各部

院堂官詳訪確查死節職名并實蹟具奏勿遺勿濫嗣
給事中趙進義王廷諫等奏言

皇恩褒忠無外而在廷論列僅舉死難之臣未及抗節之
臣竊以逆顏強項雖負天高地厚之恩而原其殺
身存仁實關綱常綸紀之大是抗節與死難跡似
異而心則同也請

勅部核實奏聞並

賜褒錄從之

定漢軍廩膳增廣生員各二十名俱歸併順天府
學例廩生均有圈撥地畝不給廩餼

禁濫舉名宦鄉賢孝子節婦及鄉飲賓僕提學官
遇有呈請務須覈實確據非年久論定者不得舉
鄉賢名宦非始終無議者不得舉節婦孝子非鄉
里推服者不得舉鄉飲賓僕如有受人請求妄舉
者師生人等即以行止有虧論其從前冒濫混襍
者徑行查革

定提學按臨赴學禮儀按臨次日祇謁

先師行禮畢升明倫堂官生以次揖見應坐官遵照
憲綱序坐講書生員總出一揖西向立講畢不必
揖跪以次下堂東向立俟行賞罰畢官吏師生先
出不必赴謝

定各學生員丁憂服闋遊學告病緣事補考各條
例禮部題准凡生員丁父母憂免其應試服闋呈
學轉詳提調試以經書論三篇廩解卷詳奪增附

青社徑行學起復凡游學從師隨祖父任告假出門者由學開明事由呈提調官轉詳批允給假不得誤歲考果千里外未能即回限三月補考違者黜凡患病者提調官取該學及醫生甘結開糧限三月內補考違限者褫降再違者黜無故臨考不到者黜凡緣事非由學政明文開復黜革者不得收學除名廩膳緣事三月以上不結停食餼不作缺事結供明准補支坐罪不至革者計拘發日月

作曠不補支凡願告老者呈學轉申提調檢勘取
結於按臨半月前申詳免試若已赴考及緣事未
結青衣發社與行止不端者俱不准告老凡補考
者提調官面試經書論三篇封交本生親齋赴補
考試對驗以防冒替

十年

諭禮部國家崇儒重道各地方設立學官令士子讀書各
治一經選為生員歲試科試入學肄業朝廷復其身有

司接以禮培養教化貢明經舉孝廉成進士何其重也
朕臨御以來各處提學官每令部院考試而後用之誠
重視此生員也比聞各府州縣生員有不通文義娼優
隸卒本身及子弟廁身學宮甚者出入衙門交結官府
霸佔地土武斷鄉曲國家養賢之地竟為此輩藏垢納
汙之所又提學官未出都門在京各官開單囑託既到
地方提學官又訪探鄉紳子弟親戚曲意逢迎甚至賄
賂公行照等定價督學之門竟同商賈正案之外另有

續案續案之外又有寄學並不報部入冊以致白丁豪富冒濫衣巾孤寒飽學終身淹抑以及混占優免虧耗國課種種積弊深可痛恨今後提學御史提學道俱宜更新惕勵嚴察前項冒濫盡行褫革大小地方人才不
等酌定名數併查舊題額例具奏定奪至於歲考除行
檢問革外其文理荒謬不通者須多置劣等嚴為降黜
其儒童經由府縣送試者詳其身家履歷廩生保結方
許入試廩生亦不得借端措索儒童督學諸臣如有仍

蹈前弊并自甘不肖以試士為市者許督撫巡按指實
叅奏如督撫巡按徇情不叅聽禮部都察院禮科糾劾
一併重處其入學生員提學御史提學道嚴諭府州縣
衛各學教官月加課程不得曠廢亦不得假借督課凌
虐諸生提學御史提學道即將歲考科考場中原卷解
部稽察不許換卷謄改禮部仍照舊例考定等第以示
勸懲仍照解到各學廩增附名數細查在學若干名黜
退若干名照報冊出示行各該府州縣張掛俾通知生

員的確姓名然後優免丁糧不許濫免地土攤累小民
違者究治除已往外今後各提學御史提學道誠能體
朕教養儲材之心實力遵行自使士風丕變人材輩出
國家治平實嘉賴之朕不靳陞賞如仍沿襲陋規苟圖
自利憲典具在決不寬宥

十一年設遼陽府儒學初遼東十五學寄設永平
府置三教官統之都司學官兼管自在瀋陽鐵嶺
開原四學寧遠學官兼管前屯錦州義州右屯四

學廣寧學官兼管永寧蓋州海州定遼右衛四學
其都司廣寧照府學例設廩生各四十名自在州
照州學例設廩生三十名海蓋錦義永寧右屯定
邊前屯寧遠鐵嶺門原瀋陽十二學照縣學例設
廩生二十名諸生俱就順天府考試嗣經五年裁
十五學名色復改永平寄學為遼學設教官一員
廩額八十名至是始設遼陽府學令寄籍永平者
改歸本學肄業至十三年又定永平遼學舊設廩

增各額八十名以四十名歸遼陽府學留四十名
歸永平寄學每年各出貢一人永平寄學每案仍
取進儒童四十名不得濫入冒籍

禁生員充當里長從御史牟雲龍請也

恭上

皇太后徽號禮成

恩詔直隸各省儒學於廩生內拔取文行兼優者一名充

貢送部廷試

定商籍生員附府學例長蘆鹽運司所屬在直隸者附河間府學在山東者附濟南府學兩淮所屬附江南揚州府學兩浙所屬附浙江杭州府學陝西所屬附寧夏府學惟河東運城別設運司學

又改定江南江北提督學院為提學道

十二年

諭禮部朕惟帝王敷治文教是先臣子致君經術為本自

明季擾亂日尋干戈學問之道缺焉未講今天下漸定朕將興文教崇經術以開太平爾部即傳諭直省學臣訓督士子凡經學道德經濟典故諸書務須研求淹貫博古通今明體則為真儒達用則為良吏米有此等實學朕當不次簡拔重加任用

十三年減定八旗童生入學名數先是八年定滿洲蒙古漢軍子弟歸順天府考試取進童生滿洲百二十名蒙古六十名漢軍百二十名至是又定滿洲

取八十名蒙古四十名漢軍百名

互見旗學門

學臣姜元衡疏言

盛京發祥之地取進童生乃儲才之首務今科歲兩考取進數目應比照京學但文教初興赴試人少請將遼陽府暫照外省大學例取進生員四十名其遼海二縣各取進十二名俟人民聚集文風漸盛再議定額從之

定遼陽府遼海二縣學廩增額數禮部議准遼海

二縣學宮初設諸生數少每學應先設廩增各五
名俟人才漸充再照各縣學例增設

十四年

詔直省學臣購求遺書

新設寧夏等衛儒學

復設廣東雷連各徭峒社學一所教讀一名

又脩復衡陽石鼓書院撫臣袁廓宇疏言衡陽石
鼓書院崇祀漢臣諸葛亮及唐臣韓愈宋臣朱熹

等諸賢聚生徒講學於其中延及元明不廢值明
末兵火傾圮祀典湮墜今請倡率捐修以表章前
賢興起後學歲時照常致祭從之

十五年停直省科試錄取儒童以三年為率隨歲
試考取

歸併宣大二鎮學政於山西提學道管理
歸併四川松潘衛學於茂州學

十六年定直省學臣不懲治劣生之罰凡劣生犯

事經教官舉報學道不盡法懲處者被撫按糾叅
照教官例一名以上罰俸六月三名以上罰俸一
年五名以上降一級七名以上革職

設湖南辰州五寨學巡撫袁廓宇疏言五寨界接
苗徭向事詩書今更歸化輸誠應請設學考取童
生七名廩生六名增廣生八名出貢年分俱照各
縣事例兩年一貢從之

令直省學臣校士務遵經傳不得崇尚異說給事

中楊雍正奏言六經之道炳若日星四書所以發明六經而集註又以發明四書為功最鉅坊刻中有四書諸家辨又有四書大全辨皆以譏訕先賢崇尚異說得罪名教不小乞

勅部毀板庶先賢傳註不為異說所奪而學術大醇人心可正矣部議應如所請併應曉示直省學臣從之定直省各衛學歸併各府州學例直隸山海衛宣府衛學邊遠無可歸併仍照舊立學外其懷來永

寧二衛學歸延慶州保安衛學歸保安州龍門所
學歸開平州昌平衛學歸昌平州

定順天府大宛二縣童生入學額數府學二十五
名縣學二十名

十七年中嚴植黨訂盟之禁禮科右給事中楊雍
建疏請

勅部嚴飭學臣約束士子不得妄立社名糾衆盟會其投
刺往來亦不許用同社同盟字樣違者治罪倘學

臣奉行不力糾叅處置得

旨士習不端結社訂盟把持衙門關說公事相煽成風深為可惡著嚴行禁止以後再有此等惡習各該學臣即行革黜叅奏如學臣徇隱事發一體治罪

嚴生童私充吏役之禁凡生員內有身列黷宮見充書吏者有原係積年衙蠹經犯罪名者並除革治罪應考童生有現在衙門應役朦朧應試者嚴查重治廩生教官扶同保結者併行議處

定貴州苗民入學及廩增額數巡撫卞三元疏言
貴州苗民中有文理稍通者准送學道考試擇其
優者取入附近府州縣衛學肄業仍酌補廩增事
下部議尋定新進苗生大學五名中學三名小學
二名均附就近各學肄業苗籍廩增大學各三名
中小學各一名

十八年令滇省土官子弟就近各學立課教誨
康熙二年新設廣西各屬儒學教授官

嚴直省學臣徇縱劣生之罰先是順治十五年定學臣據教官舉報劣生不行盡法懲處者每一名罰俸六月七名以上革職至是改定一名降四級調用二名革職

三年停止京衛武生武童部試之例先是元年十二月定在京十衛武生兵部春秋二考各取五十名至是議歸順天學政三年一試至五年併令奉天各學武生附順天武鄉試

四年設奉天各府州縣等儒學奉天府照順天例
為京府大學考取生員七名遼陽寧遠海城為中
學考取生員五名蓋平鐵嶺廣寧為小學考取生員
二名錦州府學考取生員四名

五年裁定雲南廣西兩省儒學教職雲南省共裁
教職二十一缺改廣西府學訓導為教授羅平建
水雲龍南安四州學訓導為學正祿豐羅次等十
二縣學教諭為訓導通省共設府衛學教授十八

員州學學正二十三員縣學教諭九員訓導十五員

定山東寄籍遼生歸併考試例寄籍山東者歸併山東寄籍永平者歸併永平咸除夾字號名色

五年令廣西土司子弟能習經書者就近州縣考試額取二名

又以湖廣黎平府學改隸貴州

又設四川會川衛學教授桐梓綏陽仁懷三縣學

訓導各一員

六年定八旗考試漢文例八旗子弟有願就試漢文者各都統開送到部移送順天學院滿洲蒙古別編字號漢軍與漢人同場考試文優者取入順天府學至十五年停止

八年改大寧都司學為保定府左衛學萬全都司學為宣化府前衛學

九年令各直省置社學社師凡府州縣每鄉置社

學一選擇文藝通曉行誼謹厚者考充社師免其徭役給餼廩優膳學政按臨日造姓名冊申報考察

設奉天府州縣學廩生各一名

定生員緣事未黜地方官不得擅撻例如果犯事情重先報學政俟黜革後治以應得之罪若辭訟細事發學戒飭

更定各直省取進儒童額數先是順治四年定大

府二十名大州縣十五名小學四五名至是更定
大府州縣學仍照舊例中學取進十有二名小學
或八名或七名

又定八旗取進儒童額數先是順治十三年更定
滿洲八十名蒙古四十名漢軍百名至是更定滿
洲蒙古四十名漢軍四十名凡八旗童生應試者
照漢童生例由部轉劄順天府丞先行考試後錄
送學政至二十六年定漢軍取進童生減去二十

名

十年令四川士子入籍他省者查明回籍

十二年復直省歲科兩考之制順治十五年科臣
秦准合歲科兩考為一考至是有以儲材不廣督
學不勤為言者部請仍照舊兩考例行從之

諭吏禮二部致治之道首重人才儲養之源由於學校必
衡鑒得人釐剔有法乃能革除積弊遴拔真材以彰文
治之盛近聞直隸各省學差沿襲陋規隳廢職業營私

作弊考試不公以致真材淪棄文治不光今應作何整飭差遣何官及磨勘考校之法何以盡善務期永革弊端著九卿科道會同詳確議奏尋議磨勘學差試卷之法直隸各省學臣所解之卷不能無改謄潤色且因解卷以致請託亦未可知相應停其解卷磨勘俟三年期滿督撫以稱職薦舉者照例以叅議道用以公明尤著保舉者照例內陞京堂若有徇情溺職等弊應聽督撫指名題叅若督撫徇情不叅

被科道糾叅或有別官首出將督撫一併議處從之

始令

盛京八旗子弟通習漢文者與民童一體考試

滿洲蒙古編滿字號取進三名漢軍編合字號取

進二名至十五年停止

互見旗學門

十五年改設順天遵化州學正訓導二員

十八年剔除學臣考試十弊吏部議覆左都御史

魏象樞條奏學道考試童生府考無名徑取入學
弊一額外溢取童生撥發別學弊二私查印簿某
卷某號即某人以便賄買弊三解部冊籍遲延更
改等第弊四先開六等草單嚇詐保等銀兩弊五
將文童充武童入學後夤緣改武為文弊六將童
生遠調考試弊七縱容教官包攬通賄弊八曲徇
情面孤寒棄斥弊九額外溢取童生附生員冊內
報部弊十請嗣後凡考覈學政之時若有不能剔

除此十弊者督撫糾叅有職者革職提問無職者降二級調用應如所請從之

定教職用科貢出身人員有不由科貢出身者題明送部別用若部選教職未到止許本學及別學官署事不得濫委雜流

二十二年復設直隸阜平縣學教諭

令雲南貴州兩省土司子弟得應試入學先是雲貴總督蔡毓榮疏言土司世相承襲不由選舉罔

識禮義嗣後土官族屬子弟內有通曉經義志圖
上進者請就郡邑一體應試至是差往區畫土司
事宜侍郎庫勒納疏請如蔡毓榮言乃

命雲貴二省各錄取土生二十五名其土司隸貴州者附
貴陽等府學隸雲南者附雲南等府學不准科舉亦
不准補廩

二十四年增設奉天府錦州等處儒學廩增額數
時以生聚日繁人文漸盛府尹董秉忠疏言錦州

府錦縣寧遠州三學原各設廩生一名今請各增四名每學二年一貢廣寧縣原設廩生一名今請增一名仍照舊例五年一貢增廣生員亦照各學廩膳生之數下部議行

二十五年改浙江青田龍泉二縣小學為中學定直省學臣考試遲延之罰定例學臣歲科兩試以三年為限至是復定限內不能完結者降一級調用

頒發

御書學達性天匾額於白鹿洞書院嶽麓書院

頒發

御纂日講解義經史諸書於直省學宮及白鹿嶽麓二書

院

二十五年

詔直省購求遺書

二十六年復

詔八旗子弟准與漢人考試

詳見旗學太學門

改貴州大定府學為州學

設臺灣郡縣儒學廩增生禮部議覆福建巡撫張仲舉疏言臺灣郡縣設立學校但與考人數無多未便照內地之額府學量設廩增生各二十名縣學各十名俟人才漸盛仍照直隸各省定額至廩生出貢挨年考取自康熙二十七年為始照例舉行應如所請從之

二十七年定直隸懷來永寧保安三衛學廩增生
員各額數順治十六年定懷來永寧二衛歸併延
慶州保安衛歸併保安州至是復令三衛仍各取
進儒童八名廩增及出貢俱照縣學例其三衛事
務仍令延慶保安二州學兼攝

二十八年

上南巡江浙

詔增江浙兩省儒童入學額數奉

諭朕稽古省方政治所先在崇文教江南浙江為人文萃
集之地入學額數應酌量加增永昭宏獎著該督撫詳
議奏請尋議准入學名數小學增至十二名中學十六
名大學二十名府學二十五名

新設貴州貴筑縣儒學取進童生八名廩增照小
學例

二十九年定滿洲八旗生員不能騎射者不准考
試例奉天八旗考取生員亦照此例

新設四川奉節縣儒學以奉節為夔府首邑又兼
大寧歸併議准取進童生八名

又

頌

御製孔子贊序及

顏曾思孟四贊摹本於直省學宮

詳見來
贈門

令蜀省流寓之民有開墾土田納糧應差者准其
子弟一體考試

三十年更定奉天八旗童生取進額數先是十二年定取進滿洲蒙古童生三名漢軍童生二名二十六年定漢軍減去一名至是又定奉天滿洲蒙古加增取進童生三名共六名漢軍增二名共三名

三十一
年禁學臣濫設祠生贊禮生違者照濫取入學例議處

新設貴州安化縣學取進孺童照小學八名例

定雲南貴州新設各學廩增及取進儒童額數雲
南馬龍寧師宗三州呈貢定邊元謀三縣貴州安
化縣廩增各照州縣學例行其馬龍寧州呈貢取
進儒童各照中學十二名餘照小學取進八名

三十二年定湖廣五開衛學廩增及取進儒童額
數廩增照衛學例取進儒童照中學例即令靖州
學魚撮

三十三年增定八旗內府佐領及王公府屬佐領

等子弟考試取進額數原定滿洲蒙古取進童生
四十名至是將上三旗內府滿洲佐領內管領及
五旗王公府屬滿洲佐領子弟歸併考試量增二
十名共取進六十名漢軍原定二十名至是將上
三旗內府旗鼓佐領及五旗王公府屬旗鼓佐領
子弟歸併考試量增十名共取進三十名

增定宣化府學及屬縣各學取進儒童額府學增
二名宣化懷柔照大學十五名懷來萬全蔚三縣

照中學十二名西寧龍門赤城三縣照小學八名
例

三十四年增定

盛京八旗內府佐領旗鼓佐領等子弟取進額數

盛京取進童生原定滿洲蒙古六名今內府佐領子弟量增四名共十名旗鼓佐領原定三名量增二名共五名至三十六年停止

盛京內府佐領子弟考取生員之例所增名數悉行

裁去至五十五年又增奉天合字號童生額於三名外量加一名

三十五年定彙題節孝之例禮部題准直省節孝應

旌表者照八旗例於年終彙題

定守

陵千丁子弟准入

盛京八旗漢軍內考試例

三十七年

命增雲南府州縣學廩增生員及文武童生額數

又改設雲南永北府學教授

又

頒

御制平定朔漠碑文於直省學宮

詳見太學門

三十八年增定貴州省教授學正訓導等官及文武生員取進額數清浪衛學設教授一員開州

廣順永寧獨山麻哈五州州學正各一員普安餘
慶安化普定平越都勻鎮遠銅仁龍泉永從十縣
學訓導各一員取進文武生員額各八名

又

上南巡

詔增本年江浙各府州縣大學中學小學取進童生各五
名

三十九年令直省考試儒童課以五經及小學性

理諸書有將經書小學精熟及能成誦三經五經者學臣酌量優錄論題將性理中太極圖說通書西銘正蒙一併出題

定在京冒籍生員改歸原籍例除入籍二十年以上不議外餘以部文到日為始限兩月內具呈自首改歸原籍過期照例斥革至六十年定各省亦照此例行

申嚴直省學臣考試徇私之弊督撫勒索學院棚

規司道需索常規及學臣與者皆革職提問如有
勢宦京官請託及教官巡捕進士舉人等求情者
事發分別治罪學臣隱徇者革職提問知府有包
攬入學童生將文理庸劣之人濫行考送者革職
提問學臣扶同作弊者亦如之督撫提鎮有開送
秀才童生及知縣賄薦案首者革職提問學臣扶
同作弊者亦如之凡學臣遇有挾制干請准其封
奏上

聞至如奸胥猾吏勾通內外招搖不法者令該地方官察
拏究處其祖父兄弟為子孫弟姪營謀入學者除
本童責革外有官者革職無官者從重治罪

頒

聖諭十六條於直省學宮一敦孝弟以重人倫一篤宗族
以昭雍睦一和鄉黨以息爭訟一重農桑以足衣食一
尚節儉以惜財用一隆學校以端士習一黜異端以崇
正學一講法律以儆愚頑一明禮讓以厚風俗一務本

業以定民志一訓子弟以禁非為一息誣告以全良善
一戒窩逃以免株連一完錢糧以省催科一聯保甲以
弭盜賊一解讐忿以重身命每月朔望令儒學教官傳
集該學生員宣讀務令遵守違者責令教官并地
方官詳革治罪

四十年定奉天各學廩增額數錦州學向設廩增
各五名加五名廣寧縣學向設二名加一名錦州
府寧遠州遼陽海城二縣各學向各設五名均加

二名蓋平鐵嶺開原三縣學向設一名各加一名
定土官子弟有愿應試者先送附近儒學讀書之
例

四十一年增設貴州府州衛縣儒學教諭訓導官
令同省隔府者得應考試府州衛等學各增設訓
導一員縣學各添設教諭一員時以各學考試者
甚少許照滇省之例同省隔府之人得往應試

又

頒

御製訓飭士子文於直省儒學

諭禮部訓飭士子文并令各府州縣學宮一體勒石恐有
不產石州縣地方或欲借端擾派應候國子監勒石後
以捐本彙頒各省轉發所屬學宮一體遵行

定義學小學之制

京師崇文門外設立義學

特賜

御書匾額五城地方各設小學延塾師教育有成材者選入義學凡義學小學每年廩餼共三百兩於府縣按月支給

四十二年

御書學宗洙泗匾額令懸山東濟南省城書院

又定增豫省考城柘城溫縣登封四縣取進文章額數先是因兵火之後應試寥寥定為小學取進童生八名至是河南巡撫徐潮以戶口額賦倍於

從前人才漸盛請改為中學考取童生十二名部議應如所請從之

增四川省各屬學訓導一員吏部議覆巡撫貝和諾疏言各省教職係每學二員川省五十七學每學止設一員應如所請每學各增一員從之

又

命發帑金脩理順天府府學尊經閣等處

飭學臣取士衡文不得任性好異時直隸學政楊名時專

以背誦五經取士且考取生員但係富室文雖佳
不錄若係貧寒粗通文義即予入彀

上以揚名時秉性好異背誦五經事既繁瑣亦不合例且
校士應論文學優劣不當論其貧富因奉

特旨申飭

定紅苗歸化就近教導及立義學之例戶部等衙
門議覆湖廣總督喻成龍疏言紅苗歸化將麻陽
縣學訓導移駐五寨司就近教導五寨司等處設

立義學聽苗民肄業應如所請從之

四十三年定貴州考試童生及府州衛縣學教職
例時貴州新定疆域各府州縣衛考試之人甚少
學政張豫章疏請照雲南同省隔府之人往試俟
人文漸盛再行釐正再府州衛等學請各添訓導
一員縣學各添教諭一員下部議行

奉

諭吏部教職官員必文義明通方稱厥職近見直省教職

官內不諳文義者甚多如此何以訓士著行文直省巡撫將各屬教職通行考試分別具題嗣後俱照此例不時考試尋定一二三等者給憑赴任四五等者解任學習三年再行考試六等者革職

今湖廣各府州縣熟苗中有通曉文義者准與漢人一體應試廣西土司之民人子弟及貴州苗民並照此例

申定湖廣黃梅等縣學儒童額數黃梅縣改復大學

雲夢桂陽二縣改復中學照例考取

增陝西平涼府學儒童額數時有請立平涼衛學者部議將平涼府學改為大學加撥平涼衛童生八名不必別立衛學從之

四十四年令貴州各府州縣設立義學土司承襲子弟送學肄業以俟襲替其族屬子弟併苗民子弟願入學者亦令送學該府州縣學復設訓導躬親教諭

添設貴州永寧麻哈獨山三州學正各一員普定
平越都勻鎮遠安化龍泉銅仁永從八縣學教諭
各一員

設雲南省廣南麗江二府學時以二府百姓久歸
版圖生聚日繁尚未設學巡撫佟毓秀疏言請於
二府設教授訓導官各一員每府取進童生十五
名其滇省土人有願考者准以民籍應試

旨允行

四十五年定考試儒童出題例先是三十六年定
學臣考試童生出四書題一道令作時文小學題
一道令作論至是更定儒童正考時仍作四書文
二篇覆試作四書文一篇小學論一篇

命頒行

欽定古文淵鑑資治通鑑綱目等書於直省

頒發

御書文教遐宣匾額懸黔省各義學

四十六年增設廣西省各學教諭訓導官義定等
十三縣增設教諭共十三員永寧等七州平樂等
三縣及思明土府增設訓導共十一員

四十八年改定陝西陝州葉縣中學為大學

四十九年定奉天八旗廩增額數滿洲各四名漢
軍各四名

定考試武生武童出題例凡學臣考試武生童出
論語孟子題一道孫子吳子司馬法題一道令作

論二篇

五十年申定考試教職之例凡直隸各省教官如
係學道所屬令布政司按察使會同學道考核開
送督撫具題如係學院所屬布政司按察使開送
督撫學院會同考核具題

設廣西西隆州儒學撥武緣縣訓導一員移駐西
隆州專司督課歲科兩試取進文武生員各六名
五十二年

御纂朱子全書告成

頒發直省刊板通行

定廣西西隆州學廩增額數廩生四名增廣生五
名

令各省府州縣多立義學聚集孤寒延師教讀

五十三年又定設湖南乾州鎮溪所儒學自康熙
五十四年為始歲考取文武生員各八名以瀘溪
縣訓導就近兼攝從偏沅巡撫阿琳請也

五十四年

諭直隸巡撫趙宏燮曰朕每年春間行幸水淀近見民生雖不能家給人足比之往時似覺差勝但村莊之中誦讀尚少朕思移風易俗莫過讀書況畿輔之地乃王化所先宜於窮鄉僻野皆立義學延師教讀以勉厲孝弟可望成人矣爾即徧示村莊俾皆知朕崇文好學之深意

設貴州南籠廳學取進文章武生各八名

御纂周易折中成

頒發中外刊行

增直隸府州縣衛入學額數除順天大興宛平外
大中學各增三名小學增二名

增設湖廣安陸府鍾祥縣學教諭訓導各一員

定湖南衡永寶辰郴靖六府州屬苗徭入學額數
別編字號於正額外量取一二名

五十五年定廣東各衛儒童撥入府學例是時各

省俱有衛學獨粵東未設巡撫楊琳疏請將廣州等處八衛二所文武童生各取進二名其餘三十六衛所文武童生各取進一名撥入府學從之
定四氏學正考試引

見例

詳見錄後門

定湖廣岳州府湖西六屬於澧州別建考院以洞庭湖間隔不便應試也府學訓導改駐澧州專司其事廩增各府學一半

五十七年改江南寧國府及南陵縣二中學俱為
大學

五十八年改江西興國縣小學為中學

改浙江武義縣小學為中學

定浙江西安縣孔氏

聖裔於本學正額外加取儒童二名

互見錄後門

五十九年增定四川古浪取進儒童額數增取八

名附涼州衛學

改定河南襄城山西太平中學為大學浮山小學
為中學

改貴州黃平州中學為大學因裁黃平衛學故也
令廣西土屬設立義學土屬十五處各立義學一
所令該撫擇本省舉人貢生學品兼優者每屬發
往一員教讀土屬子弟有文藝精通者就近流官
州縣附考取進

定四川東川府入學額數自六十年為始取進童

生十五名

六十年改江南銅陵縣小學為中學

更定廣東商籍童生所進額數分撥廣州府學及
南海番禺二縣學各二十名

六十一年

頒

御書學道還淳匾額於蘇州紫陽書院

皇朝文獻通考卷六十九